

## 92a UK 2007 en Jokohama

La venonta Universala Kongreso (UK) okazos de la 4a ĝis la 11a de aŭgusto 2007 en Jokohamo, Japanio. Kongresa peranto por Germanio estas Wolfgang Schwanzer, Pfarrer-Seeger-Straße 9, 55129 Mainz. Peranto por Aŭstrio estas Leopold Patek, Martinstr. 104/38, 3400 Klosterneuburg.

*red.*

## Leteramikoj en Japanio

Se vi volas havi leteramikojn en Japanio, skribu al Japana Esperanto-Korespondon-Servo, KLEG, Sonehigasi 1-11-46-204, Toyonaka, JP-561-0802, Japanio. Skribu ne per reto, sed nepre per afrankita letero aŭ poŝtkarto, kaj preslitere viajn nomon, adreson, aĝon, sekson, okupon, interesojn ktp. Nia servo nepre sendos konfirman karton al via letero.

*MINE Yositaka  
Kansaya Ligo de Esperanto-grupoj*

## 93a UK 2008 en Roterdamo

Tiuj, kiuj ne volas fari la longan vojaĝon al Japanio, havos eblecon viziti Universalan Kongreson en Eŭropo unu jaron pli poste. En 2008 la plej granda kongreso de Esperantio okazos en Roterdamo, Nederlando, la urbo kie troviĝas la sidejo de Universala Esperanto-Asocio.

*red.*

## Tradukistoj serĉataj

Kiu kapablas traduki inter la latina kaj Esperanto? Ĉu vi komprenas la latinan? Ĉu vi povus po unufoje semajne esperantigi kvinminutan latinlingvan elsendon? Se jes, bonvolu sciigi tion! La nova finna EU-prezidanto anoncas en la oficiala paĝaro de la EU-prezidanto pri tiu elsendo de novaĵoj ĉiu-semajne latine, kaj ni ŝatus re-elsendi tiujn mesaĝojn en Esperanto, "por ke pli da eŭropanoj kapablu ilin kompreni"! Tio, ni esperas, estos sufiĉe

miriga fakto, ke naciaj gazetoj publikigos nian komunikadon.

Tim Morley, UEA-membro el Britujo, pretas laŭtlegi, registri kaj eldoni la tekstojn (kiel podkaston), sed serĉas iun por traduki ilin. Bonvolu kontakti lin ĉe: [t\\_morley@argonet.co.uk](mailto:t_morley@argonet.co.uk)

*Renato Corsetti  
laŭ: Ret-Info*

## Ŝanĝoj kaj novaĵoj en la novaĵservo NUN

NUN translokiĝis kaj nun estas atingebla ĉe <http://esperanto.luin.nu/> Se vi estis registrita kiel kontribuanto en NUN, pro teknikaj kaŭzoj tiujn datumojn ne eblis movi al la nova NUN, do necesas reregistri vin por povi kontribui. La proceso estas facila, kaj prenos nur kelkajn minutojn.

Restas la bazaj reguloj por publikigo: Se vi verkas, ni publikigas. Ne plu estas limo por longeco de novaĵoj. Sed, nur la unua paragrafo de via novaĵo estos videbla en la unua paĝo, kaj maksimume 500 literoj el ĝi. La resto, kompreneble, estas legebla, sed ne en la unua paĝo. Necesas esti registrita uzanto por komenti.

Se vi havas demandojn, reagojn, problemojn ktp, ne hezitu kontakti min. Mia retadreso: [janko@heliko.luin.se](mailto:janko@heliko.luin.se)

*Janko Luin  
laŭ: Ret-Info*

## Stefan Maul en Kataluna Kongreso

La 8an, 9an kaj 10an de decembro okazos la 33a Kataluna Kongreso de Esperanto en la urbo Amposta kiu ĉi-jare estas la ĉefurbo de la kataluna kulturo. La programo estos riĉega, la gastoj elstaraj kaj la kongresejo luksa.

Riĉigos la ĉi-jaran kongreson per sia partopreno la germana ĵurnalisto Stefan Maul, la nepala profesoro Mukunda Pathik, kaj la pola pedagogo Przemysław Grzybowski, la okcitana kantisto JoMo kaj la kataluna muzikbando Kaj Tiel Plu.

Informoj kaj aliĝilo: <http://www.esperanto.cat/congres2006/index.php?>

*Ferriol Macip i Bonet  
Kataluna Esperanto-Asocio  
[www.esperanto.cat](http://www.esperanto.cat)*

## Volontulo por Francio

Mi ŝatus scii, ĉu esperantistoj jam uzis la eblecon akcepti aŭ sendi Junan Eŭropan Volontulon por partopreni Esperantajn projektojn en alia lando?

Nia klubo deziras akcepti volontulon bone scipovantan Esperanton, kaj iom la francan, por partopreni en informado pri Esperanto al lernejoj, kaj gvidi Esperanto-kursojn kaj/aŭ Esperanto-klubojn en mezlernejoj.

Ni estas pretigantaj dosieron por tiu projekto, kaj se ĝi estos akceptita ni varbos eŭropan junul(in)on por ses aŭ naŭ monatoj.

*Jeanne-Marie Cash  
[rcash@free.fr](mailto:rcash@free.fr)  
fonto: Ret-Info*

## Monda festivalo de la tero

En 2004, la asocio „Terralliance“ en Francio proponis la ideon krei Mondan Festivalon de la Tero, kies celo estas permesi al ĉiuj popoloj de la mondo, festi kune ilian planedon samtempe, por pli bone ekkonscii pri la malforteco de ĝi, kaj engaĝiĝi protekti ĝin.

La konkretaj celoj estas: interesigi kaj eduki la opiniojn, kunigi la aktivulojn jam engaĝitaj en tiu vojo kaj agi favore al medio kaj la monda solidareco.

La unua Festivalo de ka Tero okazis de la 20a ĝis la 26a de junio 2005 en unu cento da urboj el 25 landoj.

La dua ĵus okazis de la 19a ĝis la 25a de junio 2006; dum tiuj 7 tagoj la programo proponita estis:

Tero solidara  
Tero de la infanoj  
Tero pacema  
Tero antaŭgardita  
Tero de la artoj  
Tero koruse  
Tero nutriga

La himno de la ĉi-jara Festivalo estas en Esperanto kaj aŭskultebla ĉe: [www.festivaldelaterre.org](http://www.festivaldelaterre.org)

Eblas proponi aktivecojn por la venontjara!

*Denis Flochon*